

## АКАФИСТ О УПОКОЕНИИ УСОПШИХ

### Кондак 1

Непостижимым промыслом ко благу вечному мир уготовляяй, человеком времена и образ кончины определивый, остави, Господи, от века умершим вся согрешения их, приими я во обители света и радования, объятия Отчи отверсти им потщися и услыши ны, память их совершающия и поющия: Господи, Любы Неизреченная, помяни усопшия рабы Твоя.

### Икос 1

Адама падшаго и весь род человеческий от вечныя погибели спасаая, послал еси, Блаже, в мир Сына Твоего, Крестом бо и Воскресением Его возсия и нам Живот Вечнующий. На безмерное Твое милосердие уповающе, чаем нетленного Царствия Славы Твоея, усопшим даровати того просим и молим Тися: Возвесели, Господи, души житейскими бури истомленные, да скорби и вздыхания земныя забвению предадут. Услыши я, Господи, на лоне Твоем, яко же мать чада своя, и реки им: прощаются вам греси ваша. Приими я, Господи, в блаженное и тихое пристанище Твое да возрадуются о божественной славе Твоей. Господи, Любы Неизреченная, помяни усопшия рабы Твоя.

### Кондак 2

Озарением Всевышняго просвещаем, преподобный Макарий глас от черепа языческа услыша: “Егда молитесь о страждущих во аде, отрада бывает язычником”. О, дивныя силы молитв христианских, имиже преисподняя озаряется! Неверныя купно и верныя утешение премлют, егда о всем мире вопием: Аллилуиа.

### Икос 2

Рече некогда Исаак Сириянин: “Сердце милующее о людех и скотех и о твари всей молитвы слезныя ежечасно приносит, дабы сохранилися и очистилися”. Такожде и мы вси дерзновенно всем от века умершим у Господа помощи просяще, взываем: Ниспосли нам, Господи, дар молитвы пламенеющей о умерших. Помяни, Господи, вся заповедавшия нам, недостойным, молитися о них, и изжени забвенныя ими грехи. Помяни, Господи, вся без молитвы погребенныя, приими, Господи, в селения Твоя, вся от скорби или радости смертию напрасной скончавшияся. Господи, Любы Неизреченная, помяни усопшия рабы Твоя.

### **Кондак 3**

Повинны есмы в бедствии мира, в страдании безсловесныя твари, в болезнях и муках младенцев непорочных, грехопадением бо людей блаженство и лепота всея твари разрушья. О Величайший от страдальцев невинных, Христе Боже наш! Ты Един еси отпустить всем можеша. Отпусти же всем и вся, миру первозданное благоденствие подаждь, мертвии и живии да обрящут, взывая: Аллилуиа.

### **Икос 3**

Свете тихий, Искупителю всея вселенныя, любовию мир весь объемляй: слышится со креста вопль Твой о вразех Твоих: “Отче, отпусти им!” Именем всепрощения Твоего молитися Отцу Небесному об упокоении вечнем Твоих и наших враг дерзаем. Прости, Господи, кровь неповинную пролившая, житейский путь наш скорбьми усеявша, благоденствие свое слезами ближних своих устрояюща. Не осуди, Господи, гонящих ны клеветою и злобою, милостию воздаждь, ихже обидехом или оскорбихом по неведению, и да будет свята молитва наша о них таинством примирения. Господи, Любы Неизреченная, помяни усопшия рабы Твоя!

### **Кондак 4**

Спаси, Господи, в тяжких мучениях скончавшиися, убиенныя, живыми погребенныя, землею засыпанныя, волнами и огнем поглощенныя, зверьми растерзанная, от глада, мраза, бури или падения с высоты умершия и радость Твою вечную подаждь им за скорбь кончины. Да благословят страданий своих время, яко искупления день, воспевая: Аллилуиа.

### **Икос 4**

Всем, иже поемлеми суть могилой во светлой юности, иже на земли терновый венец страданий прияша, иже радости земныя не узреша, щедротами Твоея безконечныя любве воздаждь, Господи. Под тяжким бременем трудов умершим воздаяние подаждь. Приими, Господи, в чертози рая отроцы и девы и сподоби я ликовствования на вечери Сына Твоего. Утиши, Господи, скорбь родителей о чадах умерших. Упокой, Господи, вся рода и семени не имущия, о нихже несть кому молитву вознести Тебе, Создателю, да исчезнут греси их от блистания всепрощения Твоего. Господи, Любы Неизреченная, помяни усопшия рабы Твоя.

### **Кондак 5**

Яко последнее ко вразумлению и покаянию знамение смерть даровал еси, Господи. При грозном блистании ея суета земная обнажается, страсти плотския и страдания утихают, непокоривый разум смиряется. Правда вечная отвергает-

ся, отягченные же грехи и безбожницы на смертном одре бытие Твое вечное исповедуют и к милосердию Твоему взывают: Аллилуиа.

### **Икос 5**

Отче утешения всяческаго, солнцем озаряеши, плодами услаждаеши, лепотою мира друзи и врази Твоя веселиши. Веруем бо, яко и за гро-бом милосердие Твое, даже всеми отверженные грешницы милующее, не истощается. Скорбим об ожесточенных и беззаконных хулителях Святыни Твоея. Буди, Господи, над ними спасающая благая воля Твоя. Остави, Господи, без покаяния скончавшимся, спаси в омрачении ума сами себе погубившия, да угаснет пламень греховности их в море благодати Твоея. Господи, Любы Неизреченная, помяни усопшия рабы Твоя.

### **Кондак 6**

Страшен есть мрак души, от Бога удаленной, совести терзания, скрежет зубный, огонь неугасимый и червь неумирающий. Трепещут таковыя участи и, якоже о самом себе, молюся о во аде страждущих. Да снидет на ня росую прохлаждения наша песнь: Аллилуиа.

### **Икос 6**

Возсиял свет Твой, Христе Боже наш, на сидящая во тьме и сени смертной и во аде сущия, Тебе взывати не могущия. В преисподняя земли снизшед, изведи, Господи, во отраду грехми с Тобою разлученныя, но не отрехшиися от Тебе чада Твоя, страдают бо люте, помилуй я. Согреша бо на Небо и пред Тобою, безмерно тяжки грехи их, милость же Твоя безмерна есть. Посети горькую нищету душ от Тебе отдаленных, помилуй, Господи, истину по неведению гнавшия, буди им любовь Твоя не огнем палящим, но райскою прохладою. Господи, Любы Неизреченная, помяни усопшия рабы Твоя.

### **Кондак 7**

Помощь подати десницею Своею тщашеся усопшим рабом Своим, явися им, Господи, в видениях таинственных, ясновидно, на молитву их вдохновляя, да поминая отшедшия, благая дела и подвизи за ня творят, взывая: Аллилуиа.

### **Икос 7**

Церковь Христова Вселенская непрестанно ежечасно молитвы за почившия по всей земли возносит, грехи бо мира Пречистою Кровию Божественнаго венца смываются, от смерти к животу и от земли к Небеси души усопших силою молитв за ня пред олтари Божии. Буди, Господи, ходатайство Церкви умершим лестницею к Небеси. Помилуй я, Господи, предстательством Пресвятыя Богородицы и всех святых. Остави им согрешения, верных Твоих ради, день и ночь к Тебе вопиющих. Незлобивых ради младенцев помилуй. Господи, родителей их,

и матерей слезами искупи согрешения чад их. За молитвы безвинных страдальцев, за кровь мучеников погнавших и помилуй грешницы. Приими, Господи, молитвы наша и милостыни. яко воспоминание добродетелей их. Господи, Любы Неизреченная, помяни усопших рабы Твоя.

### **Кондак 8**

Мир весь общая могила священная есть, на всяком бо месте прах отец и братьев наших. Единый неизменно возлюбивый ны, Христе Боже наш, прости вся, еже от начала и до ныне умерших, да воспоят любовию безмерною: Аллилуиа.

### **Икос 8**

Грядет быти день, яко печь горящая, день великий и страшный Суда последнего, тайны человеческия откроются, книги совестныя разгнутыся... “Примиритесь с Богом! — вопиет Апостол Павел, — примиритесь прежде того страшного дня”. Помози нам, Господи, слезами живых недостающее умерших восполнити. Да будет им, Господи, звук трубы Ангельской спасения благовестием и в час Суда Твоего радостного помилования их сподоби. Увенчай, Господи, славою за Тя пострадавших и покрый благостию Твоею прегрешения немощных. Господи, вся по имени ведый, помяни во иночестем чине спасавшихся, помяни благословенныя пастыри со чада их. Господи, Любы Неизреченная, помяни усопших рабы Твоя.

### **Кондак 9**

Благословите скоротекущее время. Каждый бо час, мгновение каждое к вечности приближает. Новая скорбь, седина новая суть вестницы мира грядущаго, свидетелие тленности земныя, яко вся мимотечет возвещают, яко Царство Вечное приближися, идеже несть ни слез, ни воздыхания, но отрадная пения: Аллилуиа.

### **Икос 9**

Яко древо по времени листьев своих лишается, тако и дние наши по колых летех оскудевают. Увядает и юности празднество, светильник радования угасает, близится старости отчуждение. Друзи и сродницы умирают. Где вы, юныя лукующия? Безмолвны гробы их, но души их в деснице Твоей. Мыслим взоры их из мира невещественнаго. Господи, Ты еси Солнце пресветлое, озари и согрей усопших селения. Да преидет навеки горькаго разлучения время. Сподоби ны радостнаго свидания на Небесех. Сотвори, Господи, да вси едино будем с Тобою. Возврати, Господи, отшедшим детства чистоту и юности благодущие и праздником Пасхи да будет им Живот Вечный. Господи, Любы Неизреченная, помяни усопших рабы Твоя.

### **Кондак 10**

Проливая тихия слезы на могилах сродников наших, молимся с надеждою и с упованием взываем: скажи нам, Господи, яко оставил еси грехи их! Дажь о сем откровение таинственное духу нашему, да воспевает: Аллилуиа.

### **Икос 10**

Весь путь прешедшия жизни наша вижу озираюся, колико мно-жество людей, от перваго дне и до ныне отшедшия, и мнози их благая ми содеявшия. Любвию свою должна сим воздавая, вопию Ти. Сподоби, Господи, славы Небесныя родители моя и ближняя моя, над ложем моим младенческим бодрствовавший, возрастившия и воспитавшия мя. Прослави, Господи, пред Ангелы святыми, всех благо-вествовавших ми слово спасения, добру, правде, святым примером жизни своея учившия мя. Услади, Господи, тех, иже во дни скорби моей, манною сокровенною послужиша ми. Вся добродетели и благодетели вознаград и спаси. Господи, Любы Неизреченная, помяни усопшия рабы Твоя.

### **Кондак 11**

Где ты, смерти жало, где же и мрак и страх твой прежде бывающий? Отныне ты желанная, неразлучно с Богом сочетаеши. Покою великий субботства таинственного. Желание имам умерети и со Христом быти, взывает Апостол. Темже и мы, взирая на смерть, яко на стезю в Вечней Жизни, воззовем: Аллилуиа.

### **Икос 11**

Воскреснут мертвии и востанут сущии во гробех и возвеселятся живущии на земли, яко востанут телеса духовныя, светло прославленныя, нетленные. Кости сухия, слышите слово Господне: “Се Аз введу в вас дух живота и дам на вас жилы и возведу на вас плоть и простру по вам кожу”. Возстаньте издревле прошедшаго времени, искупления кровию Сына Божия, оживлени смертию Его, возсия бо на ны свет Воскресения. Отверзи им, Господи, ныне всю бездну совершенств Твоих. Ты сиял еси им светом солнца и луны, да узрят они и славу лучезарных ликов Ангельских. Ты услаждал еси я великолепием востока и запада светил небесных, да узрят же они и свет не вечерний Божества Твоего. Господи, Любы Неизреченная. помяни усопшия рабы Твоя.

### **Кондак 12**

Плоть и кровь Царствия Божия не наследят, доколе во плоти живем отлученнии от Христа. Аще и умрем, но оживем для Вечности. Подобаает бо тленному телу нашему в нетление облекшись и мертвенному сему бессмертием просияти, дабы во свете не вечерняго дне воспети: Аллилуиа.

### **Икос 12**

Чаем сретения со Господем, чаем ясной зари воскресения, чаем пробуждения из гробов сродников наших и знаемых и оживления в благоговейнейшей лепоте жизни умерших. И грядущее преображение всея твари торжествуем и Возсоздателю нашему вопием: Господи, к торжеству радости и доброте мир создавый, нас к святости из глубины греховныя возставивый, даждь умершим царствовати посреде бытия новаго, да возсияют яко светила на Небеси в день славы их. Да будет им Агнец Божественный светом невечерним. Даждь, Господи, и нам с ними Пасху нетления праздновати. Соедини умершия и живыя в нескончаемей радости. Господи, Любы Неизреченная, помяни усопшия рабы Твоя.

### **Кондак 13**

О, Премилосердный Отче Безначальный, всем хотяй спастися, Сына к погибшим ниспославый и Духа Животворящаго изливаяй! Помилуй, прости и спаси родныя и близкия нам усопшия и всех от века скончавшихся и предстательством их, посети нас, да вместе с ними вопием Тебе Спасителю Богу, победную песнь: Аллилуиа.

**(Этот кондак читается трижды, затем икос 1 и кондак1)**